



La Val Calanca è inna da las paucas valladas grischunas che sa preschentan sco vias tschorvas: Ins po ir amunt lung la Calancasca enfin a sia funtauna, ma lura stat ins avant la miraglia dal Piz Zapport senza nagin pass encunter nord.

# Emigraziun ed immigraziun en Val Calanca

Pertge crescha puspè la populaziun?

DA GUIJU SOBIELA-CAANITZ

■ **Tschintg da las dudesch vischnancas da la regiun grischuna italofona Moesa fan part da la Val Calanca (1). Lezza correspunda a la vallada da la Calancasca (31 km) da sia funtauna a 2840 m sur la mar a sia sbuccada a 298 m sper Grono en il flum Moesa.** La Val Calanca è inna da las paucas valladas grischunas che sa preschentan sco vias tschorvas: Ins po ir amunt lung la Calancasca enfin a sia funtauna, ma lura stat ins avant la miraglia dal Piz Zapport (3202 m) senza nagin pass encunter nord vers la Valragn. Da Rossa/GR, la vischnanca calanchina la pli auta (1089 m), maina mo la senda dal Pass Giümela (2117 m) a Biasca/TI, pia encunter vest, e quella da Trescolmen (2161 m) a Mesocco, pia encunter ost. La geografa Lara Daldina (Universitad da Losanna) ha scrit ina lavur da bachelor davart las migraziuns en Val Calanca e publitgà ina survista en ina revista grischuna (2). Ella tutga in problem impurtant da noss 21avel tschientaner.

## Il chal demografic dapi 1860

Daldina citescha in geograf da 1974: «La povertà economica porta [la Val Calanca] lentamente allo spopolamento, all'abbandono totale» (p. 75). L'autura punctuescha: «Tranter 1860 e 2010 dumbrava lezza val da 1789 fin mo pli 744 olmas; ella ha pia pers passa 1000 olmas» (p. 75). Ses geograf rilevava «l'asprezza della sua terra, le difficoltà di comunicazione e la povertà del suolo» (p. 75). Daldina: «Ils negoziis gronds u pitschens èn relativamain lontans; igl è pia bunamain necessari da posseder e duvrar in auto (...). Schizunt la posta ambulanz

ta ha chalà cun la fin da 2016; i vanzan mo pli ina posta a Buseno ed in'agentura postala ad Arvigo. Per tschellas prestaziuns ston ins ir giu a Grono u Roveredo, forsa anc pli lunsch (...). Dapi 1980 èn scolina e scola primara centralisadas a Castaneda, nua che tut ils uffants van mintga di cun ils meds da transport publics. Las scolars secundaras èn situadas giu a Roveredo (...). Mintga scolaziun ulteriura sforza la giuventetgna (...) dad ir enfin a Cuira, da l'autra vart da las Alps, ubain, grazia a las convegnas tranter Grischun e Tessin, en la regiun da Blinzuna u da Ligiaun (...). Viver en muntogna vul era dir far frunt ad in agenclima ed in'atgna geomorfologia; propi en la Val Calanca maina quai a lavinas e bovas (...). Quellas da mars 2016 n'han per cletg chaschunà nagina unfrenda, ma i han tuttina interrut u engrevgià il trafic (...) durant in temp vaira prolungà (...). Ins chapescha tgunsch che blera glied emigrescha» (pp. 77–78).

## Muntagnards per schelta

Ma il trend è sa midà: «Oz na ston ins betg pli emigrar per surviver. Ins po cuntanscher la vallada pli svelta e pli tgunsch (...). Quai fraina l'emigraziun e stimulescha perfin l'immigraziun (...). Pli baud prevalevan cleramain las emigraziuns. Oz mussa la statistica che lezzas chalan e che las immigraziuns creschan. Il 2010 vivevan 766 persunas en Val Calanca; il 2014 devi 791 ed 815 il 2016 (...). Tranter 2010 e 2016 è la populaziun calanchina creschida da 49 unitads, (...) numnadamain en las vischnancas da Rossa, Castaneda ed in pau Santa Maria (...). Pertge? Las vistas professiunalas en la regiun èn anc adina magras; la giuventetgna sto

anc adina far lungs viadis per cumplettrar sia furmaziun (...). Ma ins n'emigrescha betg pli per motivs mo economics (...). En las parts muntagnardas dals Stadis Unids, da la Frantscha e da l'Italia dal nordvest provan adina dapli geografs e sociologs da declerar las novas immigraziuns en lezs intschess. Ins distingua il pli savens duas sorts d'immigraziun, (...) quella da return e quella da scharm ('amenity migration') (...). Quellas da return èn (...) colliadas cun aspects subjectivs, determinads da las regurdanzas e dal sentiment d'appartegnientscha (...). L'auter moviment da migraziun vers intschess muntagnards (...) è quel da las uscheditgas migraziuns 'da scharm' (...). Quels moviments na provegnan betg mo da l'attracziun d'in lieu (...). Autras qualitads èn pussaivladads da 'temp liber', da cuntanscher ils lieus [interessants], custs moderads da transport (...) e raits da telecommunicaziun. Quellas novas migraziuns pertutgan regiuns che han pers ina gronda part da lur populaziun en il 19avel tschientaner e profiteschan da la migraziun nova dapi 1990 e cunzunt en noss tschientaner (...). I sa tracta da 'muntagnards per schelta'» (pp. 78–82). L'autura concluda: «Ina vallada periferica sco la Calanca porscha ina vita differenta cun sia natira 'selvadia' e ses contacts socials determinads da l'ambient muntagnard cuminaivel» (p. 84). Quest na sto tuttina betg ir vers «l'abbandono totale» profetisà d'in geograf da 1974.

**1. Las tschintg vischnancas calanchinas han num Buseno, Calanca, Castaneda, Rossa e Santa Maria in Calanca.**  
**2. Lara Daldina, Calanca: una storia di migrazioni. En: Quaderni grigionitaliani, 86avla annada, december 2017 (Cuira, ISBN 88-85905-11-0) pp. 75–84.**